

# 1 Tesalonaika

## Pol mij ned ak Tesalonaika bin bi kirop ñu kil tikak

**1** <sup>1</sup> Cin Pol, Sailas, Timoti, nibep Bapi God Bi Kib Jisas Kraiss apil mal bin bi kiri taun kib Tesalonaika midebim okok, mij nibaul ñu kil tikobin.

God nibep yimig niñil di tep gek, mid tep ginimib.

### Tesalonaika bin bi Kraiss nop niñ dil cig tep gilak

<sup>2</sup> Cin sobok gil, nibep magilsek per nep God nop tep apin. <sup>3</sup> Cin Bapi God nop sobok gil, per nep nibep gos niñil, nibi titi gil rek gipim ak gos niñil, God nop tep apin. Nibi Bi Kib cin Jisas Kraiss nop niñ dil cig tep gil, nop wög gi tep gipim; nibi Bi Kib cin Jisas Kraiss nop midmagil lil, kilis gil nop wög gilig gi midebim; nibi Bi Kib cin Jisas Kraiss eip karip lim seb kab ar alañ siñak amil tap tep dinigabin, agil, miker apek gos par ma nipim.

<sup>4</sup> Ai mam tep. Cin nipin nibi me, God midmagil lil bin bi ne ke dip bin bi okok midebim. <sup>5</sup> Cin Kraiss minim tep ne ak dam karip nibi okok amil, nibep minim magil nep ma ag ñinok. Kaun Siñ ne cinop nab adañ midil, kilis ne cinop ñek niñlig gi, Kraiss minim tep ak minim niñid yib mideb agil, nibep minim yipid gil yib ak ag ñon niñ dipek. Nibep eip kin midoligipin ak, nibep nen agil nig gilig gi midoligipin ak, nibi ke bir nipim. <sup>6</sup> Bi Kib goligip ak niñil, cin ke goligipin ak niñil, nibi nib aknib rek nep gi midoligipim. Nibi koslam yib midoligipim pen Kaun Siñ ne gek, nibi Kraiss minim tep ak niñil, miñ miñ gilig gi niñ di midoligipim. <sup>7</sup> Nig gilig gi tep goligipim nibak, Kraiss bin bi ne Masedonia Propins midelak okok abe, Akaia Propins midelak okok abe niñil, nib aknib rek nep gi tep gi midelak.

<sup>8</sup> Nibi God nop niñ dipek ak, minim nibak amil amil, Masedonia Propins, Akaia Propins okok nep mer, karip lim tigoñ tigoñ magilsek

amek niñlig gi bin bi okok magilsek bir nıpal. <sup>9</sup>Nıb ak, cin karıp lim ognap amjakon, bin bi nib okok ke kesim dil apal, “Tesalonaika bin bi kirop minim tep ak ag ñıbek, nibep di tep gil, tap esek sobok göligıpal okok kirig gil, God niñid per komıñ mideb ak nop niñ dil, ne ageb rek nep gil, <sup>10</sup>Nı ne Jisas kimek, God gek warıkak ak, seb kab ar alañ sıñak nib adık gi onıgab, agil, kod midebal,” apal. Jisas cinop nen agil kimak ak me, God kal juıl pen yur kib ñinıgab ak ma dinıgabın.

### Pol Tesalonaika midil Bi Kib nop wög gak

**2** <sup>1</sup>Ai mam sikop, nibi ke nıpım, ned karıp nibep onok ak, yokop ma onok. <sup>2</sup>Taun kib Pilıpai ned amıl ag ñon, bin bi ognap cinop minim timel agil gi timel gilak ak pen God cinop kod midil gi ñek, gilak nibak gos par ma niñil, Tesalonaika amıl nibep Kraıs minim tep ak ag ñon, cinop ak rek nep gi timel gilak ak pen abramek ag ñi midonok. <sup>3</sup>Minim nibep ag ñıbin ak sidol gil, gos timel niñil, tom agil, ma ag ñıbin.

<sup>4</sup>Kraıs minim tep dad amımel, agil, God ne ke cinop ag lek, minim tep nibak ag ñıbin. Kraıs minim ag ñon, bin bi okok niñel, kirop tep gañ agil ma gıpin; God ne niñek, nop tep gañ agil gıpin. God ne nep gos midmagıl cin nab adañ titi rek gi midobın ak niñip. <sup>5</sup>Nıbi ke nıpım, nibep tep gıniñıñ agil minim kil tep ognap nibep ma ag ñınok; mani tap okok dın agil minim ma ag ñınok. God ne ak rek nep niñip. <sup>6</sup>Nıbi Tesalonaika bin bi yıb cinop agem ar amnañ agil minim ma ag ñınok. Bin bi ognap okok yıb cinop agel ar amnañ agil minim ma ag ñınok.

<sup>7</sup>Bi Kraıs minim dad ameb midobın rek, nibep minim kasek ag ñeb rek, pen cin ma agnok. Bin okok ñi paiñañ kiri di tep gıpal rek ak, nibep minim sisain tep agil di tep gınok. <sup>8</sup>Nıbep midmagıl yıb li midoligıpin. God Minim tep ne ak nibep ag ñon, cinop ñag pak linig geblap ma kirig gıpnop. Nıbi ai mam midmagıl cin me.

<sup>9</sup>Ai mam sikop, nibi nıpım, nibep eip kın midil wög kilis gil koslam midoligıpin. Nıbep eip kın midil, God minim tep ne ak nibep ag ñi ajıl, koslam tap magıl cinop pag dap ñınıgal, agil, pıb nab kislım eyañ mani wög rek gil tap ñıboligıpin. <sup>10</sup>Nıbi nıpım, cin nibep bin bi Kraıs nop niñ dipım okok eip midlig gi, nibep gi tep nep gil, bi asıñ ma mideb, bi minim alap ma mideb rek nep midonok. God ne ke ak rek nep niñip. <sup>11</sup>Nıbi nıpım, bıñen sikop ñi pai kiri ke ag ñi tep gıpal rek nibep goligıpin. <sup>12</sup>God nibep dek, bin bi ne nep melik sek midenıgabım. Nıb ak, nibi God gıp nibak niñil, gos niñ tep gil, nag tep ar ak nep gi midenımıb, agil, nibep minim sisain ag ñoligıpin. Nıbi gos sek midil, nibep gi timel gilak ak gos par ma niñil, kilis gil, nag tep ar ak ma kirig gıniñıb, agil, minim nibak rek nibep ag ñoligıpin.

<sup>13</sup>Nıbep God minim tep ne ag ñon niñil, minim kiri ke nep ma agebal, God minim ne ke agebal, agil, niñ dipek. Niñid me, minim ag ñıbin ak,

God minim komiņ gos midmagil nibep nab adaņ gek, magil pilip. Nib ak, cin per nep God nop tep aglig gi midobin. <sup>14</sup>Pen ai mam sikop. Krais bin bi ne karip lim Judia okok cōc ke ke okok ap mogim gil God nop sobok gelak, Juda bin bi okok kirop gi timel gilak rek nep, bin bi nibi ke Tesalonaika okok nibep ak rek nep gilak. <sup>15</sup>Juda bin bi okok kiri God minim agep bi okok kirop ñag pak lil, Bi Kib Jisas nop ñag pak lil, cinop yik gi yoklak. God kirop niņil miñ miñ ma gip. Kiri bin bi okok magilsek niņel milik yowip. <sup>16</sup>Krais nop niņ del kirop komiņ kisen ñinigab, agil, Krais minim tep ne ak Juda bin bi mer okok kirop ag ñon, Juda bin bi okok kal juil, cinop kanib uren gipal. Gipal nibak, kiri per nep tap si tap timel göligipal rek nep gi dam dam damlig gi amek, tap si tap timel kiri asmen kib yib rek mideb. Pen miñi God kirop kal juil gek miker kib yib kirop owip.

### Pol, nibep kauyaņ am niņnim, agak

<sup>17</sup>Ai mam sikop. Nibep eip kin midon, Juda bin bi cinop yik gi yoklak ak, mapin gek niņlig gi midobin. Mib goņ cin siņaul midobin pen gos cin nibep eip mideb. Nib ak, nibep kauyaņ am niņin, agil, gos ak nep niņ midobin. <sup>18</sup>Nibep am niņin ag gos niņil, yad Pol, ñin omal aka omal nokim onigain agnek, pen Seten cinop kanib komib. <sup>19</sup>Nibi gipim rek niņil cin gos sek midobin; nibi gipim rek niņil miñ miñ gilig gi midobin; nibi gipim rek niņil, Bi Kib cin Jisas onigab ñin ak, minim tep nak ag ñon magil pilip me aul, agniğabin. <sup>20</sup>Nibep nep gos niņil, miñ miñ gilig gi, tep aglig gi nep midobin.

**3** <sup>1</sup>Pen nibep mapin niņil am niņin agil, kasek am niņep rek ma lek, yad Pol, Sailas, cir mal taun kib Atens midil, <sup>2-3</sup>mam cin Timoti, cir eip God nop wōg gil, Krais minim tep ne ak ag ñi tagip ak, nop ag yokor nak. Nibep gi timel gel, bin bi ognap Krais nop kirig ginimel rek lip, Timoti amil, nibep eip kin midil Krais minim tep ak ag ñi tep gek, nibi Krais nop niņ di kilis gil, gos sek midenimib, agil, nop ag yokor nak. Pen nibi nipim, Krais bin bi ne midobin rek, cinop gi timel gel miker dinigabin. <sup>4</sup>Cin nibep eip kin midil, cinop gi timel ginigal agnok ak, kiri nib aknib rek nep gipal ak bir nipim. <sup>5</sup>Nig gelak, yad nibep yimig yib niņil, gos par niņil, titi gil midebim ak niņnimin agil, Timoti nop ag yoknek. Gos yad niņnek ak, Seten ne nibep lip gek minim koslam ag ñon nipim ak kirig ginimib rek lip, ag gos niņnek.

### Timoti adik gi apil, mid tep gipim, agak

<sup>6</sup>Pen Timoti nibep am niņil adik apil agip, nibi Krais nop niņ dil cig tep gil, bin bi okok kirop midmagil lil, cirop mal gos niņlig gi miñ miñ gipim. Cir mal par siņ aul midil, nibep yimig nipir rek, nibi pen ak rek nep karip lim nibi ke okok midil, cirop mal yimig nipim, agip. <sup>7</sup>Pen cinop

gi timel gel mid tep ma ginok ñin ak, Timoti apil, nibi Krai nup niñ di kilis gipim minim ak agek, cinop midmagil pilis gi ar ar gip. <sup>8</sup>Nibi Bi Kib cig tep gil nup eip jim ñil midebim ak niñil, cin komiñ yib nep midobin.

<sup>9</sup>Mid tep gipim ak niñil, God nup tep agobin. God ne gek, nibep gos niñil, miñ miñ yib gipin. Nib ak, nup tep aglig gi midobin. <sup>10</sup>Kauyañ am nibep niñil, Krai minim tep ak ag ñon Krai nup niñ di kilis ginimib, agil, kilis gil God nup pib nab kislím eyañ sobok gilig gi midobin.

<sup>11</sup>Nib ak, Bapi God ne ke abe, Bi Kib cin Jisas abe cinop kanib yiker, midebim siñak ninigabin. <sup>12</sup>Cin nibep midmagil yib lipin rek, Bi Kib nibep gi ñek, nibi ke ak rek nep pen pen midmagil lil, bin bi okok kirop magilsek midmagil lil ginimib. <sup>13</sup>Bi Kib Jisas nibep kilis ne ñil kod mid damil, bin bi siñ ne okok magilsek dil adik gi onigab ñin ak, ne apil nibep dek, nibi God Bapi cin uñin yirik ar ne siñak, minim alap ma midek bin bi siñ ne midenigabim.

#### God nup tep ginimiñ ar ak nep ginimib

**4** <sup>1</sup>Ai mam sikop. Nibep eip kin midonok ñin ak, nibi titi gil God nup tep ginigab nag ar ak nep ginigabim ak nibep ag ñinok. Minim ag ñinok ak nibi dil nib aknib rek nep gilig gi midebim. Pen miñi cin Bi Kib Jisas bin bi ne midobin rek, yad nibep agebin, nibi gi tep gipim ak, miñi ar nibak nep kilis gil tapin nep gem amnimiñ. <sup>2</sup>Bi Kib Jisas cinop agek nibep minim tari tari ag ñinok ak nibi bir nipim.

<sup>3</sup>God nup tep ginigab ak, nibi bin bi ke komiñ tep midil, bin si bi si ma ginigabim. <sup>4</sup>Nibi magilsek, God nup tep ginigab nag ar ak nep miñ goñ nibi kod mid tep gem, bin bi okok niñel nibep minim alap ma midenigab. <sup>5</sup>Bin bi God nup ma nipal okok, gos timel niñil bin si bi si ñin agil gi tapal rek ma ginimib. <sup>6</sup>Pen nibi Krai bin bi ai mam okok tap kirop pili gi ma ñinimib. Bin bi ognap nig genigal ak, Bi Kib magilsek niñil kirop pen yur ñinigab. Minim nibak nibep ned ag ñi tep gipin. <sup>7</sup>Tap si tap timel gim, agil, God cinop minim tep ne agil ma dak; gi tep gilig gi nep midil, bin bi siñ midem, agil, cinop dak. <sup>8</sup>Nib ak, bin bi minim agobin nib aul yo niñnigal okok, cinop ma yo niñnigal; God nup yo niñnigal. Pen God ne Kaun Siñ ne nibep ñeb.

<sup>9</sup>Krai bin bi ai mam okok kirop midmagil lim, agil, minim ak ñu kil ma tikjin. God nibep gos tep ñek, nibi ke niñil bir pen pen midmagil lipim. <sup>10</sup>Krai bin bi ne Masedonia Propins midebal okok magilsek ak rek nep bir midmagil lipim. Pen nibep minim kilis agil agobin, kilis gil per nep nag ar nibak nep gem amek kib amnimiñ.

<sup>11-12</sup>Pen nibep ned agnok rek, bin bi okok eip kapkap mid tep gin, agil gem amnimiñ. Wög wari nibi okok ke gil tap niñnimib. Nib ak, tap magil, mani tap nibi okok ke midek niñlig gi, tap asib ma ag niñenigabim me, bin bi Krai nup ma nipal okok, nibep niñel tep ginigab.

### Bi Kib adik gi onigab

<sup>13</sup>Pen ai mam sikop. Nibep minim alap ag ñi tep ginigaun. Bin bi nibi ognap kimel, pis nep kimbak agil, bin bi ognap yimig gek sil apal rek ma ginimib. <sup>14</sup>Jisas kimak ak, God gek warikil komiñ mideb, agil nipin rek, bin bi Jisas nop niñ dil kimbak okok, Jisas adik gi onigab ñin ak, God ne gek, Jisas bin bi ne kimbak nib okok kausek onigab, agil nipin.

<sup>15</sup>Pen Bi Kib ne ke minim ag ñoligip rek nipin, ñin kisen nibak cin bin bi komiñ midon niñlig gi Bi Kib adik gi onigab okok, bin bi ned kimlak okok kirop ma yem gi amnigabin. <sup>16</sup>Minim kib alap seb kab ar alañ nib agek, ejol magilsek okok kod mideb ejol kib ak sik gaul gek niñlig gi, God akil magil ak agek niñlig gi, Bi Kib ne ke seb kab ar alañ siñak nib onigab. Bi Kib apek, bin bi Kraiss nop niñ dil kimbak okok ned wariknigal. <sup>17</sup>Kiri wariknigal niñil God ne cinop bin bi ne komiñ midenigabin okok kirop eip ulik nab sak gek, seb kab alañ ap ran jak amil Bi Kib eip mogim ginigabin. Nib ak, cin Bi Kib eip per nep per nep midonigabin.

<sup>18</sup>Nib ak, minim agobin nib aul pen pen ag amil apil gil, gos sek midenimib.

### Bi Kib cin adik gi onigab ak niñil mid tep gil kod midojin

**5** <sup>1</sup>Pen ai mam sikop. Bi Kib ne ñin akal onigab, bin bi tap tari gel niñlig gi onigab ak, nibep ma agjin. <sup>2</sup>Nibi ke nipim, Bi Kib onigab ak, nop kod midenigal ñin ak ma onigab. Bi tap si dep okok bin bi kin ambal won ak opal rek ak onigab. <sup>3</sup>Miñi kapkap mid tep gipin, cinop miñi tap alap ma ginigab, agnigal ñin ak nep kasek apek, gos par yib niñnigal. Bin ñi painañ tik donig gek yur gip rek ak ginigab; kasek nep yur timel dil pirik gi amnimel rek ma linigab.

<sup>4</sup>Pen ai mam sikop. Bi tap si dep okok apil kariñ nap bi del, midmagil kiri pilis ginigab. Pen nibi kislim pis siñak ma midebim rek, ñin kib nibak apek, midmagil nibep pilis ma ginimij. <sup>5</sup>Nibi magilsek melik ñi pai midebim; nibi magilsek pib nab ñi pai midebim. Cin kislim ñi pai mer; cin kilip ñi pai mer. <sup>6</sup>Bin bi ognap wisin kinbal rek ma midojin; gos niñ tep gil, gos timid sek midojin. <sup>7</sup>Bin bi wisin kinbal okok, kislim eyañ nep kinbal. Bin bi ñig kilis ñibil saköl ñapal okok, kislim eyañ nep gipal. <sup>8</sup>Pen cin bin bi pib nab tapin okok, gos niñlig gi midon. God Minim niñ dilig gi, God nop midmagil lilig gi midon; nig gon, sior kilis ami bi tol gi lipal rek, pabil bak cin siñak midenigab. Bi Kib cin Jisas Kraiss eip kariñ lim seb kab ar alañ siñak amil tap tep dinigabin nipin ak, gos niñlig gi midon; nig gon, usajil kilis bad ami bi tol gi lipal rek, nabic cög ar cin midenigab. <sup>9</sup>Tari ginig: God cinop gak ak, yur kib dinimel, agil ma gak; Bi Kib cin Jisas Kraiss gek, kariñ lim seb kab ar alañ siñak amil per nep nop eip komiñ midenimel, agil gak. <sup>10</sup>Kraiss cinop nen agil kimak ak,

komij midon onigab aka kimil midon onigab ak minim ma mideb; cin amil per per nep ne eip komij midenigabin. <sup>11</sup>Nib ak, nibi Krai bin bi ne pen pen Krai minim tep ak ag ñil, niñ di kilis gil, gos sek midenimib. Pen agesin aul nibi ke nib akñib rek nep bir gipim.

<sup>12</sup>Ai mam sikop. Bi kib nibep koslam wög gi ñilig gi, minim tig biloklig gi, minim ag ñilig gi midebal okok, kirop di rep ginimib. <sup>13</sup>God ke agek wög nig gipal ak, kirop midmagil lil di rep ginimib. Pen nibi magilsek kapkap jim ñil midenimib.

<sup>14</sup>Ai mam sikop niñim. Bin bi wög ma gil mid tep ma gipal okok kirop minim kilis agnimib. Bin bi mapin gek gos par li midebal okok kirop minim sisain agil ag ñi tep ginimib. Bin bi sain okok kirop gi ñinimib. Bin bi okok magilsek kirop per nep minim sisain agil kapkap midenimib. <sup>15</sup>Bin bi ognap nibep gi timel genimel, pen gi timel ma ginimib. Pen pen di tep gil, pen pen gi tep ginimib. Pen bigi sikop okok abe, kirop magilsek nib akñib rek nep gi tep ginimib. <sup>16</sup>Per nep miñ miñ gilig gi midenimib; <sup>17</sup>per nep God nop sobok gilig gi midenimib; <sup>18</sup>tap tari tari nibep ginimiñ ak, ñin per per nep God nop tep aglig gi midenimib. Krai Jisas bin bi ne midil nig gilig gi midem me, God nop tep ginigab. <sup>19</sup>God Kaun cinop gos ñinimiñ agil niñlig gi midenimib. <sup>20</sup>Bin bi God minim agep okok minim agenimel ma kirig ginimib. <sup>21</sup>Pen bin bi ognap tom agnimel rek lip ak, niñ tep yib ginimib. God Minim yipid gil ak agenimel niñil dinimib; esek agenimel niñil ma dinimib. <sup>22</sup>Nag timel ar ognap ma ginimib.

<sup>23</sup>God cinop bin bi di tep gek kapkap mid tep gipin ak, ne ke nibep kod midlig gi gek, nibi bin bi ke komij tep ne midenigabim. God ne ke gek, Bi Kib cin Jisas Krai onigab ñin ak, kaun nibi okok, gos timid midmagil nibi okok, mib goñ nibi okok magilsek, asiñ sikol acib eñap ma midonimiñ. <sup>24</sup>God nibep minim tep ne agip ak, minim ne ageb ar akñib rek nep gip. Nib ak nipin, siñaul agesin rek nibep ginigab.

<sup>25</sup>Ai mam sikop. Cinop gos niñil, God nop sobok ginimib. <sup>26</sup>Nibi Bi Kib nop niñ dipim rek, Krai bin bi ai mam magilsek pen pen ag wasu dilig gi, mikem bom siloknimib. <sup>27</sup>Bi Kib cin ak niñ mideb rek nibep agebin, minim ñu kil tikesin nibaul, ai mam okok kirop magilsek udin li agem niñnimel.

<sup>28</sup>Bi Kib cin Jisas Krai nibep mapin niñil, di tep gilig gi midonimiñ.